



URDHRI I INXHINIERIVE'
ENGINEERING ORDER
INXHINIERET E DISIPLINAVE
ENGINEERING DISCIPLINES

INXHINIERËT E DISIPLINAVE

Gjeodezi, Hidroteknik, Ndërtimi (Profili Ndërtues i Përgjithshëm, Profili Transport, Profili Konstruktor), Mjedis (Profili Trajtim Ujerash, Energji), Mekanike (Profili Konstrukione dhe Mjete Lëvizëse, Energjetik), Ekonomike, Materiale, Tekstil dhe Modë, Elektronike, Telekomunikacioni, Informatike, Elektrike, Mekatronike, Matematike, Fizike, Gjeolog (Profili Xeheror, Hidrogjeologji, Gjeologji Inxhinierike, Profili Gjeofizik, Palontolog, Mikro Palontolog, Shpimi), Miniere (Profili Ndërtim Shfrytëzim, Markshajder, Pasurimi), Agronomi e Larte, Agromjedisi, Përpunim Druri, Pyjore Mekanike Bujqësore.

12 MARS 2023

VENDIM I DATËS (data e regjistrimit noterial)

A K T I i K R I J I M I T

“URDHRI I INXHINIERIVE NË REPUBLIKËS E SHQIPËRISË”

Në Tiranë, Shqipëri, me pjesëmarrjen e grupit nismëtar të profesionistëve, që kanë përfunduar Edukimin e Nivelit të Larte Universitar, por pa u kufizuar drejt të ardhmes, **që zotërojnë kualifikimet profesionale të veçanta**, të cilët zotërojnë dokumentin zyrtar “Diplomë”, me TITULL *Inxhinier te Profesionit te zgjedhur prej tyre*.

(ref, pika 1, neni 49 te Kushtetutës se Shqipërisë)

V Ë R E J T Ë N:

1. REPUBLIKA E SHQIPËRISË

- ✓ Më datën 22 Tetor 2009, në mbështetje të neneve 78 dhe 83 pika 1, të “Kushtetutës së Republikës së Shqipërisë”, me propozimin e Këshillit të Ministrave është miratuar nga Kuvendi i Shqipërisë, ligji nr. 10171 “Për Profesionet e Rregulluara në Republikën e Shqipërisë”, i cili është shpallur me dekretin nr. 6322, date 5.11.2009 të Presidentit të Republikën e Shqipërisë.

DHE QE ESHTË NE ZBATIM TE;

- ✓ Directives 2005/36/EC of the European Parliament and of the Council of 7 September 2005 on the recognition of professional qualifications, OJ L 255, 30.9.2005, as amended by Directive 2013/55/EU of the European Parliament and of the Council of 20 November 2013 amending Directive 2005/36/EC on the recognition of professional qualifications and Regulation (EU) No 1024/2012 on administrative cooperation through the Internal Market Information System (‘the IMI Regulation’) OJ L 354, 28.12.2013

Si edhe ne zbatim;

- ✓ te ligjit nr. 103/2014 “Për Miratimin e Strategjisë së Sigurisë Kombëtare të Republikës së Shqipërisë”, thuhet;

Në themel të Strategjisë së Sigurisë Kombëtare të Republikës së Shqipërisë është aspirata e popullit shqiptar dhe vullneti politik për të realizuar vizionin e përbashkët, për një atdhe që garanton siguri, drejtësi, barazi dhe mirëqenie për të sotmen dhe brezat e ardhshëm; një vend i lirë, demokratik dhe i zhvilluar, anëtar i përkushtuar i NATO-s dhe i integruar në Bashkimin Europian.

Strategjia buron nga detyrimi kushtetues: për të garantuar sigurinë e vendit; forcuar liritë themelore, të drejtat e njeriut dhe shtetin e së drejtës; për të mbrojtur dhe promovuar interesat e shqiptarëve kudo që ndodhen; ruajtur dhe zhvilluar identitetin kombëtar. Strategjia mbështetet mbi vlerat kulturore dhe historike të popullit shqiptar dhe vokacionin e tij evropian.

Përfaqësuesit e Shtetit, Këshilli i Ministrave dhe Kuvendi i Republikës së Shqipërisë, ka pranuar dhe i ka dhënë të gjitha të drejtat dhe detyrimet, për të krijuar këtë institucion të urdhrit profesional si Ent Publik Kombëtar.

1). Secili ka të drejtën të fitoj mjetet e jetesës së tij me punë të ligjshme, që e ka zgjedhur ose pranuar vete. Ai është i lire të zgjedhë profesionin, vendin e punës, si dhe sistemin e kualifikimit të vete profesional

2. JURIDIKSIONI DHE KOMPETENCA:

Juridiksioni dhe Kompetencat janë në bazë dhe në zbatim të gërmës a) pika 2 të nenit 2, pika 1 dhe 2 e nenit 22 të LIGJ Nr. 44/2015 “Kodi i Procedurave Administrative të Republikës së Shqipërisë.

Ne vijim të këtij Akti, profesionistët me kualifikimin profesional të veçantë me titull të prezantuar sa më lartë, të cilët zotërojnë dokumentin zyrtar “Diplomë”, kanë kompetencë, jo vetëm të drejtën ligjore për të kryer një veprimtari konkrete, por edhe detyrim për ta ushtruar këtë veprimtari.

- ✓ Kjo është e “drejta e ushtrimit të profesionit”, ku gjithë secili përfaqëson interesat e ligjshme nëpërmjet institucionit të përfaqësues me urdhrin profesional përkatës, si edhe vendosin për të drejta dhe detyrimet nëpërmjet akteve administrative, brenda fushës së veprimtarisë që ligji i ka përcaktuar. Për këtë qëllim, është e nevojshme për të forcuar mbrojtjen e të drejtave themelore të çdo Disipline Profesionale me vete, nën dritën e ndryshimeve në shoqëri, progresit shoqëror dhe zhvillimet shkencore dhe teknologjik, duke bërë ato të drejta më të dukshme në një Statut dhe të përfaqësuar nga çdo organizatë.
- ✓ Bashkimi i inxhinierëve në U -in INXHINIERIVE, kontribuon në ruajtjen dhe zhvillimin e këtyre vlerave të përbashkëta, duke respektuar diversitetin e çdo Disipline të Inxhinierive dhe të drejtën dhe detyrat e secilit profesion, si dhe identitetet kombëtare, organizimin dhe funksionimin e autoriteteve të tyre publike në nivel kombëtar, rajonal dhe nivelet lokale. Në bashku synojmë dhe kërkojmë të promovojmë një zhvillim të balancuar dhe të qëndrueshëm në dhënie të shërbimeve dhe sigurojmë një lëvizje të lirë të Profesionisteve, si edhe veçanërisht të shërbimeve dhe kapitaleve të çdo Profesionisti, duke realizuar siguri në dhënie të shërbimeve për shoqërinë, si edhe me efektivitet dhe cilësi dhe minimalisht të vlerësuara.

Institucioni i URDHRI INXHINIERI’VE NË REPUBLIKEN E SHQIPËRISE, me qëllim koordinimin dhe garantimin e vetë rregullimit të të drejtës së ushtrimit të profesioneve specifike, ka të drejtën dhe detyrimin për të menaxhuar zhvillimin e qëndrueshmërinë të;

- a) Inteligjencës Profesionale te Disiplinave te Inxhinierive si edhe te nen disiplinave, por pa u kufizuar tek specialistet dhe nën specialistet plotësues.
- ✓ Mbështetur ne kapaciteti intelektual i njerëzve qe kryejnë shërbime profesionale, te cilët karakterizohen nga perceptimi, vetëdija dhe vullneti i tyre, mbështetur mbi kualifikimet e përkatëse te çdo profesionisti.
 - ✓ Mbështetur ne inteligjencën e profesionistit me nivelin e larte te edukimit qe posedojnë aftësitë njohëse për të mësuar, për te formuar koncepte, për te kuptuar, për te aplikuar logjikën dhe arsyen, duke përfshirë kapacitetin për të njohur modelet e kodit te vete rregullimit, si edhe qe kuptojnë idetë, planifikojnë, zgjidhin probleme, marrin vendime, mbajnë mend, si edhe qe të përdorin gjuhën për të komunikuar me qellim ushtrimin e profesionit te zgjedhur prej vete atyre.
- b) Koordinimit te Punës ndërmjet urdhrave të veçantë, më qëllim që të garantohet vetë rregullimi dhe funksionimi i secilit Urdhër, si edhe do te angazhohet për te nxitur dhe krijuar urdhrat e veçanta, si edhe do te ndihmoje për hartimin e Akteve Administrative, etj.;
- c) Do te vendosi apo edhe vendosin me konsensus dhe me unanimitet, për ato çështje te cilat janë te domosdoshme për te zbatuar një detyre konkrete, me qellim gjetjen e mekanizmit dhe miratimin e skemës përkatëse te menaxhimit te shërbimeve;
- d) Do te ndërtojë institucion ekzekutive vetërregulluese te përbashkëta për ato shërbime qe do te jene te domosdoshme ne interes te publiku dhe qe kërkojnë gjithë përfshirjen e shoqërisë se Inxhinierive;
- e) E drejta për administrim të mirë;
- Çdo profesionist ka të drejtë të ketë çështjet e tij apo të saj të cilat do të trajtohen në mënyrë të paanshme, të drejtë dhe brenda një kohe të arsyeshme nga institucionet e urdhrave profesional përkatës dhe trupat e Enti Kombëtar. Kjo e drejtë përfshin:
- ✓ Të drejtën e çdo profesionist për t'u dëgjuar, para çdo masë individuale e cila do të ndikojë në atë çka mund të jetë marrë negativisht;
 - ✓ Të drejtën e çdo profesionisti qe të ketë qasje në dosjen e tij apo të saj, duke respektuar interesat legjitime të konfidencialitetit, sekretit profesional dhe të biznesit;
 - ✓ Detyrimi i administratës për të dhënë arsyet për vendimet e saj.
- f) Zhvillimin e Qëndrueshëm te Shërbimeve ne fushat e Disiplinave te Inxhinierivë;

- ✓ Përcaktimit të hapësirës së shërbimeve të Disiplinave të Inxhinierive, mbi Kualifikimin e përfutur nga Edukimi i Nivelit të Lartë.
- ✓ Ndërtimin e Hapësirës së Inteligjencës Profesionale të Disiplinave të Inxhinierive me qëllim të interpretimit dhe përcaktimit të Titullit Inxhinier, për çdo disiplinë dhe për të unifikuar në të ardhmen drejt integritetit ndërkombëtar të shoqërisë. Hapësirë e Inteligjencës Profesionale të Disiplinave të Inxhinierive, veçanërisht nënkupton ndarjen e Termit të Titullit "Inxhinieri" aktiviteti i cili ushtrohet në;
 - a) Sipërfaqen e Zhvillimit dhe Prodhimit Ekonomik,
 - b) Detyrë/Detyrim në Inxhinieri të Specifikuar,
 - c) Detyrim i veçantë i Inxhinierisë i apo jo i domosdoshëm.

Institucioni i URDHRI TË INXHINIERI'VE NË REPUBLIKËN SHQIPERISE është Ent Publik Kombëtar që përfaqëson interesat e përbashkëta në qëllim koordinimi dhe garantimin e së drejtës së ushtrimit të profesioneve, në fushat e caktuar të çdo discipline të inxhinierive. Në zbatim plotë të ligjit nr. 10171, datë 22.10.2009 "Për Profesionet e Rregulluara në Republikën e Shqipërisë", si edhe rregullon marrëdhëniet ndërmjet tyre në funksion të publikut, si edhe direktivave të BE-së sa më lart shpjeguar, me qëllim të integritetit të çdo profesioni/profesionisti në sipërfaqen Ndërkombëtare.

Kompetenca vetjake ose funksionale është të ushtroj funksione vetë-rregulluese, dhe zë vendin si organ i administratës publike në sistemin e përgjithshëm të organeve shtetërore, i cili përcakton llojin e punës që i përket Koordinimit dhe Garantimit të Disiplinave profesionale përkatëse, në ushtrimin e funksioneve të çdo urdhërimi profesional në veçanti, si dhe funksionon si organit që i përket këtij niveli të caktuar dhe vendos vetëm për ato çështje.

- | | |
|-----------|---|
| Reference | <ul style="list-style-type: none"> a) Directive 2005/36/EC of the European Parliament (i ndryshuar) b) ligji nr. 10171 datë 22.10.2009, "Për Profesionet e Rregulluara në Republikën e Shqipërisë", c) ligjit nr. 103/2014 "Për Miratimin e Strategjisë së Sigurisë Kombëtare të Republikës së Shqipërisë" |
|-----------|---|

Në këto akte të sipërpërmendura, përcaktohet Qarte që çdo (Titull Profesional), përfaqësohet me Urdhrin e vetë dhe që Organizohet dhe funksionon në veçanti, si institucion i pavarur, autonom dhe me vetë-rregullim d.m.th. me status si Person Juridik, Ent Publik Kombëtar, UNIK Universal.

3. RREGULLIMI LIGJOR

Enti Publik Kombëtar, termi i të cilit është shprehur me ligjin nr. 10171, datë 22.10.2009 “Për Profesionet e Rregulluara në Republikën e Shqipërisë”, ka një normë ligjore që disiplinon mënyrën e tij të funksionimit dhe strukturën përkatëse organizative. Në bazë të ligjit nr.8480, datë 27.5.1999 “Për Funksionimin e Organeve Kolegjiale të Administratës Shtetërore dhe Enteve Publike”, që përkufizohet; *“Organe kolegjiale të administratës shtetërore dhe të enteve publike në kuptimin e këtij ligji, do të quhen të gjitha ato subjekte të së drejtës publike të cilat e ushtrojnë veprimtarinë e tyre ekzekutive vendimmarrëse në mënyrë kolegjiale.*

Në vijim të këtij Akti, Institucioni i URDHRI TE INXHINIERI'VE NE REPUBLIKEN E SHQIPERISE, do të drejtohet nga “Organi Kolegjial”, në dy nivele, të cilët do të ushtrojnë veprimtarinë e tyre vendimmarrëse dhe ekzekutive-vendimmarrëse në mënyrë kolegjiale, në bazë të ligjit nr.8480, datë 27.5.1999 “Për Funksionimin e Organeve Kolegjiale të Administratës Shtetërore dhe Enteve Publike”, si edhe në zbatim të ligjit nr. 44/2015 “Kodi i Procedurave Administrative të Republikës së Shqipërisë”

4. PËRPUTHJA E AKTIT ME PËRMBAJTJEN E LIGJIT

Ligjin nr. 10171, datë 22.10.2009 “Për Profesionet e Rregulluara në Republikën e Shqipërisë” (i ndryshuar), në objektin e tij është përcaktimi i rregullave për mënyrën e organizimit dhe të funksionimit të profesioneve të rregulluar në Republikën e Shqipërisë, d.m.th. të Urdhrit, që kushtëzohet nga një nivel i caktuar formimi apo kualifikimi profesional. Në këtë rast “Titulli” i kualifikimi përkatës dhe “diploma” është dokumenti zyrtar, që mban një Profesionist me Edukimin e Nivelit të Lartë Universitar, ‘Reference VKM-ja nr. 649, datë 14.09.2011 ‘Për përcaktimin e listës së specialistëve dhe në specialistëve apo specialistëve plotësues për profesionet e rregulluara’, por pa u kufizuar në faktin dhe në të ardhmen;

5. PËRPUTHJA E AKTIT ME QËLLIMIN E LIGJIT

Në kuadër të përmirësimit dhe forcimit të autoritetit publik, të interesave jetike kombëtare, të shërbimeve, të cilët kryejnë aktivitetin vetë-rregullues dhe që lidhen me mbrojtjen e interesit publik,

të sigurisë, të shëndetit, të zhvillimit ekonomik, duke respektuar parimin e krijimtarisë dhe shqyrtimit të pavarur, si edhe të autonomisë së profesionistëve. Ky Akt i Krijimit gjen mbështetje thelbësore në të gjitha Konceptet e Strategjisë së Sigurisë Kombëtare të Republikës së Shqipërisë, në vlerat, Interesat, përgjegjësitë, si edhe veçanërisht në Forcimin e Institucioneve Publike, Kombëtare (në Republikën e Shqipërisë):.

Qëllimi është mbrojtja dhe garantimi i standardeve profesionale të këtyre disiplinave, në mënyrë që shërbimet komplekse të ndërtohen mbi mekanizmin e bashkëpunimit, nëpërmjet Kartës Teknologjike Përkatese, si edhe të bëhen prej profesionistëve të kualifikuar, të cilët plotësojnë kushtet dhe kriteret e parashikuara. Ky akt është në përputhje të plotë me përmbajtjen dhe qëllimin e ligjit, në ndihmë të së cilit është edhe ligji nr. 44/2015 “Kodi i Procedurave Administrative të Republikës së Shqipërisë”.

P Ë R K Ë T O A R S Y E

Inxhinierët që zotërojnë kualifikimin profesional, me Edukim të Lartë Universitar, me Titujt respektiv, të cilët janë pajisur me dokumentin zyrtar “Diplomë”, të Republikës së Shqipërisë, (POR PA U KUFIZUAR NË TË ARDHMEN), në mbështetje dhe në zbatim të;

- ✓ pikës 1 të neni 11, pikës 1 të neni 49, pikës 4 të nënti 57, nënti 58, pikës 1 të neni 59, të “Kushtetutës së Republikës së Shqipërisë”,

si edhe

- ✓ të neneve 25,26,27,28,29,30,31, “Kodi Civil i Republikës së Shqipërisë”,

si edhe

- ✓ ligjit nr. 44/2015 “Kodi i Procedurave Administrative të Republikës së Shqipërisë”,

si edhe

- ✓ të ligjit nr.8480, datë 27.5.1999 “Për Funkcionimin e Organeve Kolegjiale të Administratës shtetërore dhe Enteve Publike”;

si edhe

- ✓ të ligjit nr. 103/2014 “Për Miratimin e Strategjisë së Sigurisë Kombëtare të Republikës së Shqipërisë”,

si edhe

- ✓ ligjit nr. 10171, datë 22.10.2009 “Për Profesionet e Rregulluara në Republikën e Shqipërisë” (i ndryshuar),

V E N D O S Ë N

KAPITULLI I

IDENTITETI

NENI 1

PERMBAJTA E PERSONIT JURIDIK

Në mbështetje të neneve 24, 25, 26, (përmbajtja e personit juridik), të nenit 27, (emri i personit juridik), të nenit 28, (qendra e personit juridik), të nenit 29,30,31, (zotësia e personit juridik), të ”Kodit Civil të Republikës së Shqipërisë”

- 1) Urdhri i Inxhinierive në Republikës e Shqipërisë është Person Juridik, është Ent Kombëtar që përfaqëson interesat e përbashkëta, të profesionistëve me kualifikimin profesional me Edukim te Larte Universitar, të cilët zotërojnë dokumentin zyrtar “Diplomë” dhe që vetë-rregullohen, i njohur edhe nga *ligji nr. 10171, datë 22.10.2009 “Për Profesionet e Rregulluara në Republikën e Shqipërisë” (i ndryshuar).*
- 2) Personi Juridik ka emrin e tij të plotë dhe të shkurtuar. Emri i Entit Kombëtar do të quhet “Urdhri i Inxhinierive ne Republikën e Shqipërisë”, (UIRSH-së), si edhe do të ketë stemën dhe vulën autentike, qe do te jete stema e Republikës se Shqipërisë. Ne çdo akt administrativ ne krye te fletës do te vendoset edhe identiteti dhe pozicion gjeografik Evropian me flamur, si edhe identiteti i Shtetit me flamur, siç është vendosur ne krye te këtij akti (*referuar ligjit nr. 8926, date 22.7.2002, “Për Formën dhe Përmasat e Flamurit Kombëtar, Përmbajtja e Himnit Kombëtar, Formën dhe Përmasat e Stemës se Republikës te Shqipërisë dhe Mënyrën e Përdorimit te Tyre” i ndryshuar).*
- 3) Qendra e “Urdhri i Inxhinierive ne Republikën e Shqipërisë” (UIRSH-së), do të jetë në Tiranë, ku do të jenë dhe organi drejtues edhe ekzekutiv i tij.
- 4) Zotësia e personit juridik e (UIRSH-së), do të fitojë të drejtat dhe do të marrë përsipër detyrime civile që nga çasti i këtij Akt-Krijimit.
- 5) (UIRSH-së), mund të kryejë çdo veprim juridik të lejuar në ligj, në aktin e krijimit, te statutit, te rregullore, si edhe vepron me anë të organeve të veta të parashikuara, në këtë akt krijimi.

KAPITULLI II

ORGANIZIMI DHE DREJTIMI

NENI 2

ORGANET KRYESORE

Enti Kombëtar, drejtohet nga organet përfaqësuese, të cilat do të ushtrojnë veprimtarinë vendimmarrëse dhe ekzekutive në mënyrë kolegjiale, në zbatim të ligjit nr.8480, datë 27.5.1999 “Për Funkcionimin e Organeve Kolegjiale të Administratës Shtetërore dhe Enteve Publike”.

- 1) Organet kryesore vendimmarrëse, të Entit Publik Kombëtar janë:
 - a) Asambleja Kombëtare;
 - b) Kolegji i Presidentëve;
 - c) Kryesia e Entit Kombëtar;
- 2) Enti Kombëtar, do të ketë strukturën ekzekutive në përbërje, si:
 - a) Sekretari i Përgjithshëm (administratori i entit);
 - b) Zyra e Strategjisë dhe Menaxhimit të Riskut;
 - c) Zyra e Koordinimit Kombëtar;
 - d) Zyra e Koordinimit Ndërkombëtar;
 - e) Zyra e Informimit dhe Konsultimit Publik;
- 3) Enti Kombëtar përfshin edhe disa struktura të ngritura në përbërje ose pranë tij, si:
 - a) Regjistri Kombëtar që përfshijnë shërbime komplekse të inxhinierive;
 - b) Arkiva Administrimi dhe Ekzekutimi;
 - c) Baza të dhënash Kombëtare dhe Ndërkombëtare;
 - d) Fjalori Teknik Universal dhe Biblioteka.
 - e) Etj. të miratuara nga Asambleja Kombëtare.

NENI 3

ASAMBLEJA KOMBETARE

- 1) Asambleja Kombëtare është organi më i lartë përfaqësues i Entit Kombëtar.
- 2) Asambleja Kombëtare është organ vendimmarrës përbëhet nga tërësia e anëtarëve si me poshtë:
 - a) Nga Presidentet e çdo Enti Kombëtar të disiplinave përkatëse të Inxhinierisë;
 - b) Anëtarët themelues të Entit Kombëtar;

- c) Anëtarët themelues te çdo Enti Kombëtar te disiplinës përkatëse te Inxhinierisë;
 - d) Anëtarët e Kryesisë se Entit Kombëtar te Urdhrit te Inxhinierive.
 - e) Anëtarët e Kryesisë se çdo Enti Kombëtar te disiplinave përkatëse; Përkatësisht te 5 anëtarët, Presidenti, zëvendës Presidenti, Sekretari i Përgjithshëm, Drejtuesi i Edukimit, Drejtuesi i Komisionit Disiplinor dhe Etikes, pamvarsisht nga përzgjedhjet e drejtuesve te rijnë te Kryesive këta (ish) do te jene gjithmonë anëtarë te Asamblesë Kombëtare te Urdhrit te Inxhinierive;
- 3) Pozicionin e Presidentit do ta përfaqësoj anëtari themelues i U-it te Inxhinierive deri ne Konstituimin dhe zgjedhjen e Presidentit te Urdhrit përkatës.
 - 4) Ne rastin qe përfaqësimi nuk behet i mundur nga themeluesi (i disiplinës përkatëse dhe ose te pa përfaqësuarit), me krijimin e Entit Kombëtare te disiplinës se inxhinierit përkatëse pozicioni e Presidentit do ta përfaqësoj Kryetari i Urdhrit Përkatës.
 - 5) Mbledhja e Asamblesë Kombëtare thirret nga Sekretari i Përgjithshme dhe ose kur kërkohet nga 1/3 e të gjithë anëtarëve të Asamblesë Kombëtare.
 - 6) Asambleja Kombëtare do te funksionoj me dy dhoma.
 1. Nga Kolegji i Presidenteve, (1).
 2. Nga e gjithë tërësia e Anëtarëve, (1,2,3,4).
 - 7) Asambleja Kombëtare ka këto funksione:

A. DHOMA 1- Kolegji i Presidenteve, (1).

- a) Miraton rregulloren (KODIN), që garantohet vetë rregullimin dhe funksionimin;
- b) Miraton skemat përkatëse te menaxhimit te shërbimeve komplekse inxhinierike;
- c) Miraton aktivitet ekonomike (shërbimet) ne varësi te këtij Entit;
- d) Propozon Planin e Strategjisë dhe Menaxhimit te Riskut;
- e) Propozon ndryshimet ne Statut, Rregulloret, etj.
- f) Është Përgjegjës për konfirmimi përfundimtar për “konsultimin me publikun”, për njoftimin publik te shoqërisë, si edhe për konsultimi teknik me çdo urdhër përkatës.
- g) Kolegji i Presidenteve merr ne shqyrtim dhe vendos për ato çështje te karakterit teknik, qe përkon me koordinimi e shërbimeve komplekse, por jo ne themel te shërbimit teknik specifik.
- h) Kolegji si rregull mblidhet 1 here ne muaj. Drejtimi i tij behet me rotacion nga çdo presidencia e urdhrave përkatës, radha e tij formohet si rezultat e kohës se krijimit te çdo urdhri përkatës.

- i) Kolegji i Presidenteve vendosin me konsensus dhe me unanimitet për çdo çështje, ne rast se nuk arrihet, konsensusi ne dy takime, atëherë do te hidhet ne votim me te gjithë tërësinë e Anëtarët e asamblesë, (1,2,3,4) qe është dhoma 2.
- j) Ne zbatim te germës i), te këtij neni; Kolegji i Presidenteve mund te organizohet ne grupime sipas ndarjes se Termit te Titullit ‘‘Inxhinieri’’, sa me sipër;
 - a) Inxhinieri nen Sipërfaqen e Zhvillimit dhe Prodhimit Ekonomik,
 - b) Detyre/Detyrim ne Inxhinieri te Specifikuar,
 - c) Detyrim i veçantë i Inxhinierisë i apo jo i domosdoshëm.
- k) Me rast se konsensus dhe me unanimitet gjendet edhe brenda çdo grupi për çështjet qe përkojnë atij grupit, atëherë edhe ky fakt konsiderohet konsensus unanim.

B. DHOMA 2 - Tërësia e Anëtarëve te Asamblesë, (1,2,3,4)

- a) Zgjedh Kryesin e Entit Kombëtar me votim të fshehtë dhe me shumicë të thjeshtë të të gjithë anëtarëve të saj, për një periudhe 5 (pese) vjeçare.
- b) Ky proces përzgjedh (*young leaders*) drejtuesit e rinj te Kryesisë jo me vone se 12 muaj para përfundimit te mandatit te kryesisë, d.m.th. do te kryhet ne vitin e katërt qe përkon me mbylljen e se drejtës se qeverisjes se Kryesisë se mëparshme. Data efektive 5 vjeçare është data e aktit te krijimit.
- c) Miraton Planin e Strategjisë dhe Menaxhimit te Riskut;
- d) Miraton Statutin e Urdhrit;
- e) Miraton rregullore për organizimin dhe funksionimin e Asamblesë Kombëtare;
- f) Miraton rregullore për administrimin dhe funksionimin e entit;
- g) Analizon veprimtarinë vjetore të organeve të Urdhrit, Shqyrton raportin e auditit të jashtëm, sipas përcaktimit, si edhe miraton Buxhetin.

NENI 4

KRYESIA E ENTI KOMBETAR

1) Kryesia është organ vendimmarrës-ekzekutiv administrativ i Entit Kombëtar.

Kryesia përbëhet nga 5 pese Anëtarë:

- a) Sekretari i Përgjithshëm (administratori i entit);

- b) Drejtuesi i Zyrës se Strategjisë dhe Menaxhimit te Riskut (sek 2);
 - c) Drejtuesi i Zyrës se Koordinimit Kombëtar, (sek 3);
 - d) Drejtuesi i Zyrës se Koordinimit Ndërkombëtar, (sek 4);
 - e) Drejtuesi i Zyrës se Informimit dhe Konsultimit Publik, (sek 5):
- 2) Kryesia e Urdhrit organizon dhe drejton Urdhrin në bazë e në zbatim te aktit te krijimit, statutit të tij dhe vendimeve të Asamblesë Kombëtare.
- 3) Kryesia e Urdhrit zbaton të drejtat e ngarkuara me ligj, akteve nënligjore, si edhe ligjeve të tjera të Republikës së Shqipërisë.
- 4) Kryesia e Urdhrit është përgjegjës:
- a) për organizimin dhe drejton punën ne administratës së Urdhrit;
 - b) për ndjekjen e vazhdueshme të zbatimit të vendimeve të Asamblesë Kombëtare;
 - c) për harmonizimin, bashkërendimin e punës, monitorimin dhe ofrimin e asistencës teknike;
 - d) përgatit rregulloren për organizimin e zgjedhjeve të përgjithshme te entit;
 - e) përgatit Statutin dhe rregulloret e Urdhri;
 - f) si edhe akteve te tjera për vendimmarrje;
- 5) Kryesia ka te drejtën e personit juridik për;
- a) Lidhjen e kontratave;
 - b) E padive administrative, civile dhe penale;
 - c) E mbajtjes së llogarive;
 - d) Të tjera për ushtrimin e funksioneve në bazë te këtij akti dhe në zbatim të ligjeve dhe akteve nënligjore në fuqi.

NENI 5

E DREJTA E PUNESIMIT

- 1) Për tu punësuar ne Urdhrin e Inxhinierive e ka çdo profesionist qe do te plotësojë kushte e rregullores se administrimit te entit.
- 2) Paraprakisht e drejta e punësimit do te jete për anëtarët themelues se Entit.
- 3) Për tu zgjedhur ne organin drejtues te urdhrit;
- a) E ka çdo anëtar themelues i Urdhrit te Inxhinierive, si edhe drejtues i administratës se urdhrit, si edhe te çdo anëtar themelues i Urdhrave te veçantë, me kërkesë te tyre;
 - b) Çdo anëtar i kryesisë se Urdhrave te veçantë, kërkesa e cila behet nga kryesia e urdhrit te tyre;

KAPITULLI III

DREJTIMI, KALENDARI, PROCESVERBALI DHE KUNDERSHTIME ADMINISTRATIVE

NENI 6

KALENDARI NUNEROR I MBLEDHJEVE

- 1) Urdhri i Inxhinierëve në ushtrimin e së drejtës publike, për veprimtarinë ekzekutive vendimmarrëse në mënyrë kolegjiale është e detyrueshme të zbatohet grafiku minimal i mbledhjeve. Në këtë Akt Vendoset grafikun minimal si më poshtë:
 - a) Asambleja Kombëtare
 - o DHOMA 1 - Kolegji i Presidentëve (1), mbledhet minimalisht 1 herë në muaj;
 - o DHOMA 2 - Tërësia e Anëtarëve të Asamblesë, (1,2,3,4), mbledhet minimalisht 2 herë në vit;
 - b) Kryesia mbledhet minimalisht 1 herë në javë;
- 2) Mbledhjet e Paneleve Teknike bëhen në përputhje me programin dhe miratuar nga Asambleja Kombëtare, Kolegji i Presidentëve dhoma 1.
- 3) Mbledhjet e Kryesisë bëhen me thirrje nga Sekretari i Përgjithshëm.

NENI 7

DREJTIMI I MBLEDHJEVE

- 1) DHOMA 1 - Kolegji i Presidentëve (1), përbehet nga Presidentet e Urdhrave Profesional përkatës, të cilët janë njëkohësisht edhe Drejtuesit e Asamblesë së DHOMES 1, të Urdhrit të Inxhinierëve.
- 2) Presidenti/Drejtues, drejton mbledhjen, drejton diskutimet dhe siguron zbatimin e ligjit dhe marrjen e vendimeve të drejta.
- 3) Presidenti/Drejtues mund të shtyjë ose të mbyllë mbledhjen përpara kohe, në rastet kur situata e përligj këtë veprim. Në këto raste duhet të merret një vendim i arsyetuar, i cili do të pasqyrohet në procesverbalin e mbledhjes.

- 4) Çdo presidencia do të drejtoj këtë asamble sipas radhës, që përkon me kohen e themelimit të çdo Urdhri Përkatës.
- 5) Koha e drejtimit të një Presidence do të jete për një periudhë 1 mujore. Nëse Presidenca sipas radhës heq dore nga drejtimi, drejtimi e merr Presidenca vijuese.
- 6) DHOMA 2 - Tërësia e Anëtarëve të Asamblesë, (1,2,3,4), Organizimin dhe Drejtimi e mbledhjes do ta kryej Kryesia e Urdhrit nëpërmjet Sekretarit të Përgjithshëm.
- 7) Funksionimi behet sipas këtij Akti dhe rregullores së miratuar nga Asambleja Kombëtare.

NENI 8

PROCESVERBALI I MBLEDHJEVE

- 1) Në çdo mbledhje mbahet një procesverbal, ku behet një përmbledhje e gjithçka që, u tha në mbledhje, data dhe vendi i mbledhjes, anëtarët që morën pjesë, çështjet që u diskutuan, vendimet që u morën, si dhe forma dhe rezultati i votimeve.
- 2) Procesverbali mbahet nga sekretari dhe duhet t'u paraqitet për miratim të të gjithë anëtarëve në fund të mbledhjes ose në fillim të mbledhjes pasardhëse. Pas miratimit procesverbali nënshkruhet së bashku nga Drejtuesi i Seance dhe Sekretari.
- 3) Në rastet kur vetë organi e shikon të arsyeshme dhe mbledhja është e ndarë në seanca, procesverbali miratohet menjëherë pas përfundimit të seancës përkatëse.
- 4) Vendimet jo normative të organeve kolegjiale hyjnë në fuqi vetëm pasi të jete miratuar procesverbali përkatës.
- 5) Vendimet të cilat merren nga Asambleja Kombëtare për ato vendime që konsiderohen të cilësuar, do të bëhen gjithmonë me nënshkrim procesverbal (PROCESVERBAL NËNASHKRIMI).

NENI 9

KUNDERSHTIME ADMINISTRATIVE

Drejtesit ose çdo anëtar tjetër i organit kolegjial, Asamblesë Kombëtare dhe Kryesisë, ka të drejtë të bëjë ankim në gjykatën administrative kundër vendimeve të marra nga këto organe dhe të kërkojë pezullimin e zbatimit të tij, kur çmon se vendimi është i kundërligjshëm.

KAPITULLI IV

KOMPETENCAT

NENI 10

TE DREJTAT DHE DETYRAT

Të drejtat dhe detyrat jenë si më poshtë këtij Akt Krijimi, por pa u kushtëzuar në legjislacionin në fuqi që mund të lejojë kryerjen e veprimeve gjithmonë në të mirë, si edhe në interes të Institucioni dhe Shoqërisë.

Të drejtat dhe detyrimet e Urdhrit të Inxhinierive.

Në bazë dhe zbatim të së drejtës së ushtrimit të profesionit të të gjithë secilit dhe bashkërisht për ato shërbime që mekanizmi i bashkëpunimit është i domosdoshëm ushtron këto të drejta:

- 1) E drejta e vetë rregullimit:
 - a) vendos dhe miraton rregulloren (KODIN), që garantohej vetë rregullimi dhe funksionimi i institucioneve, mbi këtë kusht apo koncept, si edhe do të angazhohet për të nxitur dhe zbatuar dhe krijuar urdhrat e veçanta, si edhe do të ndihmojë për hartimin e Akteve Administrative, Unike, etj.;
 - b) miraton regjistrin kombëtar të shërbimeve për çdo disiplinë.
 - c) nxjerr vendime, urdhra dhe udhëzime Administrative (jo teknike), që janë të detyrueshme për zbatimin e një shërbimi kompleks, të skemës përkatëse të menaxhimit dhe bashkëpunimit të shërbimit duke përcaktuar qartë detyrat dhe përgjegjësitë e çdo discipline profesionale (jo teknike'' për krijimin e akteve teknike është detyrë e çdo urdhri profesional);
 - d) krijon strukturë administrative për kryerjen e funksioneve dhe ushtrimin e kompetencave;
- 2) Të ndërtojë hapësirën e Inteligjencës Profesionale të Disiplinave të Inxhinierive me qëllim të interpretimit dhe përcaktimit të Titullit Inxhinier, për çdo disiplinë dhe për të unifikuar në të ardhmen drejt integritetit ndërkombëtar.
- 3) Të promovojë, botojë dhe shpërndajë standardet e reja ndërkombëtare, si dhe të garantojë respektimin e tyre në shërbim të shoqërisë.
- 4) Të ndërtojë fjalorin Teknik Universal për të gjitha disiplinat e inxhinierive, si edhe interpretimi për çdo tog fjalësh apo fjalie që përdoret për çdo çështje në fushat e disiplinave përkatëse.
- 5) Vendosi për të drejtën e administrimit me të mirë. Me qëllim parandalimi për çdo masë individuale e cila do të ndikojë në atë çka mund të jetë marrë negativisht për shoqërinë e

inxhinierëve. Urdhri i Inxhinierëve përcakton hapësirën e përgjegjësisë profesionale për çështje;

- a) te hetimit dhe gjykimit, administrativ;
 - b) te hetimit dhe gjykimit, administrativ - civil;
 - c) te hetimit dhe gjykimit, civil;
 - d) te hetimit dhe gjykimit, civil - penal;
 - e) te hetimit dhe gjykimit, penal;
- 6) E drejta për kryerjen e gjykimit profesional të karakterit struktural të shërbimit dhe teknik për shërbime komplekse, si edhe të atyre shërbimeve që kryen nga më shumë se një profesionit të një profesioni. Për personin fizik/juridik që ka kryer shërbimin dhe që ka vepruar në kundërshtim me normat teknike dhe referencat profesionale për kryerjen e shërbimit, që rregullojnë fushën e shërbimit të parashtruara në nga Urdhri i Inxhinierëve, si edhe në legjislacionin tatimor.
- 7) E drejta e pronësisë:
- a) ushtron të drejtën e pronësisë që e fiton, shet dhe jep në përdorim pronën e paluajtshme ose të luajtshme të tij, si dhe ushtron të drejta të tjera sipas legjislacionit në fuqi për çështjet e pronësisë;
 - b) te drejta e pronësisë ushtrohet nga Asambleja Kombëtare (dhoma 2) e Urdhrit, i cili nuk mund t'ia delegojë ushtrimin e kësaj të drejte askujt tjetër.
- 8) E drejta e kryerjes së veprimtarive ekonomike:
- a) ushtron të drejtën e veprimtarisë ekonomike që nuk bie ndesh me orientimet themelore të politikave ekonomike të shtetit, si edhe të çdo disipline përkatëse të Inxhinierëve, nëpërmjet krijimit të njësive ekonomike e institucione në varësi të tij, *(për shërbime komplekse të inxhinierëve)*;
 - b) ushtron të drejtën e përdorimit të të ardhurave që përfitohen nga veprimtaria ekonomike për mbështetjen dhe përmbushjen e funksioneve të Entit Kombëtare.
- 9) E drejta e personit juridik, gëzon dhe ushtron të gjitha të drejtat e përcaktuara në Kodin Civil të Republikës së Shqipërisë dhe të legjislacionit në fuqi:
- a) të drejtën e lidhjes së kontratës;
 - b) të drejtën e krijimit të personave të tjerë juridikë;
 - c) të drejtën e ngritjes së padisë administrative, civile dhe penale;
 - d) të drejtën e mbajtjes së llogarive;

- e) të drejta të tjera për ushtrimin e funksioneve në bazë dhe në zbatim të ligjeve dhe akteve nënligjore në fuqi.

KAPITULLI V

BUXHETI I URDHRI

NENI 11 FINANCIMI

- 1) Urdhri i Inxhinierive është ent publik jo buxhetor, ai ka buxhetin e tij, të cilin e miraton Asambleja Kombëtare dhe e administron Kryesia në përputhje me rregullat financiare në fuqi dhe me rregulloren e brendshme për veprimtarinë financiare të Urdhrit, të miratuar nga kjo asamble.
- 2) Burimet financiare të Urdhrit të Inxhinierive janë të ardhurat nga:
 - a) të cilat përcaktohen me vendim të Urdhrit;
 - b) tarifat e vendosura për aktet dhe dokumentet e lëshuara nga Urdhri;
 - c) tarifat e shërbimeve;
 - d) grande, donacione të ndryshme vendase dhe të huaja të ligjshme;
 - e) aplikimet për projekte administrimi edukimi trajnimi etj. te kësaj natyre, dhuratat, subvencionet e sponsorizimet, të cilat përdoren në përputhje me legjislacionin në fuqi, si dhe të ardhura të tjera të ligjshme.
- 3) Të ardhurat e siguruara, sipas përcaktimit të bërë në pikën 2, të këtij neni, Urdhri i përdor për të përmbushur synimet dhe objektivat e tij.

KAPITULLI VII

KAPITALI

NENI 12 PRONESIA E PATJETERSUESHME

- 1) Asnjë nga anëtarët e Urdhrit nuk do të ketë kërkesë personale mbi pasurinë e Urdhrit dhe asnjë pjesë e kësaj pasurie nuk do të paguhet ose transferohet tek asnjë person i cili në çdo kohë është ose ka qenë anëtar i Urdhrit.
- 2) Shpërblimi në këmbim të çdo shërbimi të dhënë në Urdhër ose rimbursimi i shpenzimeve të njohura në mirëbesim likuidohen sipas rregullores së brendshme për veprimtarinë financiare të

Urdhrit. Likuidimi i detyrimeve financiare sipas kësaj pike, nuk duhet të parandaloj/pengoj/ndaloj dhënien e shpërblimeve ose bursave për anëtarët, si edhe pagesën e interesit për paratë e huazuara nga institucioni.

3) Urdhri i Inxhinierive ne Republikën e Shqipërisë është pronë publike dhe e patjetërsueshme.

KAPITULLI VIII

ANKIMI I SHËRBIMIT

NENI 13

Kërkesë Ankimore/Ankim

1. Kërkesat për ankim të shërbimit profesional të karakterit teknik në fushën e Shërbimit të paracaktuar nga urdhri i Inxhinierive, lidhur me Karakterin e Strukturës së Shërbimit Kompleks si edhe të atyre shërbimeve që kryen nga me shume se një profesionit të një profesioni i drejtohen Urdhrit të Inxhinierive.
2. Kërkesa për Ankim të Shërbimit mund të paraqiten nga:
 - a) çdo person fizik apo juridik që përfiton shërbimin dhe/ose eksperti që kryen shërbimin;
 - b) organet Drejtuese të Urdhrit të Inxhinierive;
 - c) çdo organ tjetër shtetëror, ent, universitet, prokurori, gjykatë, etj. të parashikuar me ligj;
3. Personat mund të kërkojnë:
 - a) të kthehet për rivlerësim dhe korrigjim të të metave;
 - b) të kryhet tërësisht shërbimi nga e para;
 - c) të kryhet shërbimi nga Urdhri.
4. Nëse palët nuk arrijnë të sigurojnë ose nuk paraqesin dokumentacionin e plotë për rrethana të justifikuara ose të pajustificuara Komisioni i Ankimit të Shërbimit Profesional vendos të kryhet shërbimi nga Urdhri, dhe nëse ka element që çojnë në një veprë penale bën kallëzim në organet kompetente.
5. Nëse aktet e hartuar nga eksperti që nuk janë të ankimuara nga palët sipas pikës 2, të këtij neni dhe që nuk janë zbatuar, eksperti dhe/ose palët përfituese kanë të drejtë të dërgojnë kërkesën për konfirmim të Aktit brenda një periudhe kohore deri në 15 ditë pune nga koha e njoftimit të Aktit.

NENI 14

Ankimi

- 1 Personi fizik apo juridik paraqet kërkesën ankimore/ankimin lidhur me shërbimin e kryer pranë Urdhrit, kur personi fizik/juridik që ka kryer shërbimin ka vepruar në kundërshtim me normat teknike dhe referencat profesionale me Karakterin e strukturës së shërbimit Kompleks, në kryerjen e shërbimit, që rregullojnë fushën e shërbimit përkatës profesional të miratuar nga Urdhri i Inxhinierive, si edhe në legjislacionin tatimor.
- 2 Eksperti i cili ka kryer shërbimin, mund të ankohet pranë Urdhrit lidhur me mos zbatimin e këtij ligji nga personi fizik/juridik që ka kryer shërbimin.

NENI 15

Shqyrtimi

1. Për shqyrtimin e kërkesave për Ankimim të shërbimit, pranë Urdhrit funksionon Komisioni i Ankimit të Shërbimit Profesional, si organizëm i gjykitimit profesional. Ky komision përbëhet nga 5 anëtarë të miratuar nga Asambleja Kombëtare, me mandatë të hapur, përkatësisht:
 - a) një përfaqësues nga Asambleja Kombëtare;
 - b) një nga Kryesia e Urdhrit;
 - c) një nga stafi i Urdhrit;
 - ç) dy inxhinierë nga jashtë administratës së Urdhrit (përkatësisht të profilit përkatës që përkon me Titullin e Ekspertit);
 - d) Kryetari i Komisioni të Ankimit të Shërbimit Profesional zgjidhet me short për çdo çështje ankimimi nga përbërja e komisionit.
2. Mënyra e ngritjes dhe funksionimit të Komisioni të Ankimit të Shërbimit Profesional përcaktohet në rregulloren e gjykitimit profesional të Urdhrit.
3. Komisioni shqyrton ankesat e bëra nga çdo person apo institucion në organet e Urdhrit, të cilat lidhen me ushtrimin e profesionit dhe përbëjnë shkelje të Rregullave të Miratuar nga Urdhri i Inxhinierive për ato shërbime të parashikuar dhe pa diktuar në shërbimet unike të secilës Disipline.
4. Detyra kryesore e Komisionit të Ankimit të Shërbimit Profesional, në përmbushje të objektit të punës së tij lidhur me shqyrtimin e ankesës ndaj shërbimit të bërë sipas të këtij akti dhe të rregullores, është të kontrolloj:
 - a) përputhshmërinë me detyrën;
 - b) rregullshmërinë e kushteve strukturale dhe teknike;

c) ligjshmërinë për zhvillimin e qëndrueshëm të projektit;

ç) sigurinë, shëndetin dhe interesin publik.

5. Komisioni i Ankimit të Shërbimit Profesional, me ekspertizë të Urdhrit ose të pavarur, mund të organizojë anketime të publikut për problemet e respektimit të Këtyre rregullave për kryerjen e shërbimit. Përfundimet që nxjerr nga studimi i anketimeve dhe nga ankesat e publikut ia raporton Urdhrit, duke sugjeruar masat për përmirësim.

6. Çdo 6 muaj Komisioni i Ankimit të Shërbimit Profesional, boton një përmbledhje të përfundimeve të nxjerra, në bazë të këtij neni, në një buletin të veçantë që botohet nga Urdhri.

7. Procedura administrative fillon me paraqitjen e kërkesës nga subjektet e përcaktuara në këtë Akt.

8. Komisioni i Ankimit të Shërbimit Profesional, nëpërmjet njohjes së akteve dhe/ose në seancën e parë i kërkon palëve që të zgjidhin çështjen me ndërmjetësim.

9. Komisioni i Ankimit të Shërbimit Profesional zbaton procesin e rregullt ligjor dhe nxjerr aktet administrative në bazë dhe zbatim të ligjit të Kodit të Procedurave Administrative, Kodit të Procedurave (Kodit) Civil në Republikën e Shqipërisë, normave dhe referencave përkatëse të miratuara paraprakisht nga urdhri, si edhe të këtij akti.

10. Çdo Akt Administrativ (shërbimi) i Komisionit të Ankimit të Shërbimit Profesional regjistrohet në regjistër dhe publikohet në Buletinin e Njoftimeve Zyrtare të Urdhrit.

11. Nëse brenda 30 ditëve nga hyrja në fuqi e aktit, i cili nuk zbatohet, atëherë bëhet kërkesa për nxjerrjen e Urdhrit Ekzekutiv nga pala përfituese ose personi fizik/juridik që kryen shërbimin ose Urdhri.

14. Aktet Administrative (shërbimi), që përfshinë zbatimin e këtij akti, të parashikuara në pikën 9 të këtij neni, përbën titull ekzekutiv.

15. Vendimet e Komisionit të Ankimit të Shërbimit Profesional të Urdhrit do të ekzekutohen nga Shërbimi i Përmbarimit Gjyqësor, në përputhje me dispozitat e Kodit të Procedurës Civile. Urdhri nuk ka detyrim të parapagujë tarifën ose tarifën për shërbimin përmbarimor.

KAPITULLI IX

LIGJSHMËRIA

REFERUAR Nenit 30, Kodi Civil RSH-se
*Personi juridik mund të kryejë çdo veprim juridik të lejuar në
ligj, në aktin e krijimit ose në statut.*

NENI 16

HYRJA NË FUQI E AKTIT TË KRIJIMIT

1. Zotësia e personit juridik e “Urdhrit të Inxhinierive në Republikën e Shqipërisë”, (UIRSH-së), fiton të drejtat dhe merr përsipër detyrime civile që nga çasti i Aktit të Krijimi. Statuti është pjese e pandashme nga akti i krijimit dhe që është njëkohësisht i miratuar në këtë kohë dhe konfirmuar me procesverbalin përkatës.
2. Çdo ndryshim në statut të Entit Kombëtar, të Urdhrit të Inxhinierive do të duhen 2/3 e votave të Asamblesë Kombëtare.
3. Urdhri i Inxhinierive do të kryejë aktivitet ekonomik dhe regjistrohet në sistemin tatimor.
4. Ky Akt Krijimi është përfundimtar, i formës së prerë dhe hy në fuqi ditën noterizimit.

12 MARS 2023